



**INNTAKA LÖGREGLUFRÆÐINEMA  
HÁSKÓLANS Á AKUREYRI (HA) Í  
STARFSNÁM HJÁ MENNTA- OG  
STARFSÞRÓUNARSETRI LÖGREGLU  
(MSL)**

**STARFSNÁM I – JANÚAR 2021**

## 1. INNGANGUR

---

Þann 14. maí 2014 samþykkti Alþingi frumvarp til laga um breytingu á lögreglulögum, nr. 90/1996, sem varð að lögum nr. 51/2014. Í samræmi við ákvæði til bráðabirgða í lögnum skipaði innanríkisráðherra í kjölfarið starfshóp til þess að endurskoða skipulag og starfsemi Lögregluskóla ríkisins og gera tillögu að framtíðarskipan lögreglumenntunar. Starfshópurinn skilaði skýrslu 15. september 2014. Í lok febrúar 2015 var svo annar starfshópur skipaður til að endurskoða innihald lögreglunáms og var hlutverk hans m.a. að fara yfir innihald lögreglunáms hér á landi, bæði grunnnáms og framhaldsnáms, og setja fram tillögur um með hvaða hætti efla mætti námið þannig að það tæki mið af þörfum samfélagsins.

Það var eindregin niðurstaða beggja starfshópanna, sbr. nánari umfjöllun hér á eftir, að færa skyldi lögreglumenntun á háskólastig en jafnframt að sérstök eining innan lögreglu hefði það hlutverk að sjá um tengingu fræðilegs og verklegs hluta námsins, sem og að sinna rannsóknar- og fræðslustarfi innan lögreglu. Leiddi þetta til þess að þann 31. maí 2016 samþykkti Alþingi frumvarp til laga um breytingu á lögreglulögum nr. 90/1996, sem varð að lögum nr. 61/2016.

Í 1. mgr. 38. gr. lögreglulaga nr. 90/1996 kemur fram að mennta- og starfsþróunarsetur lögreglu annist inntöku nemenda í starfsnám í samstarfi við háskóla. Einnig kemur fram að ákvörðun setursins um val á nemum í starfsnám sé endanleg.

Mennta- og starfsþróunarsetur lögreglu byggir inntöku sína á lögum og þeirri reynslu sem varð til hjá valnefnd Lögregluskóla ríkisins. Gert er ráð fyrir að 40 efstu á matsþáttum verði boðið pláss í starfsnám.

Í 2. Mgr. 7. gr. reglugerðar nr. 221 frá árinu 2017 um mennta- og starfsþróunarsetur lögreglu er fjallað nánar um inntöku á nemendum í starfsnám. Þar segir:

*Mennta- og starfsþróunarsetur lögreglu skal leitast við að velja til starfsnáms þá hæfustu úr hópi umsækjenda á hverjum tíma. Einkum skal þess gætt að velja ekki til starfsnáms einstakling sem ætla má að eigi erfitt með að sinna lögreglustarfi svo að vel fari, svo sem vegna óreglusemi, fjárhagsvanda eða vegna þess að hann hefur hlotið dóm fyrir brot á sérrefsilöggjöf. Mennta- og starfsþróunarsetur lögreglu skal fyrst meta hverjir umsækjenda eru hæfir og uppfylla almenn inntökuskilyrði. Þá getur setrið látið hæfa umsækjendur undirgangast inntökupróf og önnur próf sem rétt þykir að framkvæma. Mennta- og starfsþróunarsetur lögreglu getur að auki óskað eftir frekari gögnum frá umsækjendum, eða um þá, og að þeir sæti sérstakri læknisskoðun. Umsækjandi ber kostnað af umsókn um starfsnám.*

Við inntöku á nemum í starfsnám þarf að hafa í huga að slíkar ákvarðanir eru stjórnvaldsákvarðanir í skilningi stjórnsýslulaga. Málsmeðferð skal vera vönduð og í samræmi við ákvæði laga og reglugerða sem um það gilda.

### **Lög, reglugerðir og annað sem reynt getur á**

- Stjórnarskrá lýðveldisins Íslands nr. 33/1944, einkum 20. gr.
- Lög um réttindi og skyldur starfsmanna ríkisins nr. 70/1996
- Stjórnsýslulög nr. 37/1993, einkum 8., 10., 11., 13. og 22. gr.
- Lögreglulög nr. 90/1996
- Reglugerð um mennta- og starfsþróunarsetur lögreglu nr. 221/2017
- Reglugerð um starfsstig innan lögreglunnar nr. 1051/2006
- Upplýsingalög nr. 140/2012, einkum 7. gr. og 1. mgr. 27. gr.
- Lög um jafna stöðu og jafnan rétt kvenna og karla nr. 10/2008 (jafnréttislög), einkum 20. og 26. gr.
- Álit Umboðsmanns Alþingis.
- Dómar.
- Verklagsreglur ríkislögreglustjóra

Reykjavík í febrúar 2020

Mennta- og starfsþróunarsetur lögreglu

## 2.0 Inntaka starfsnema

---

### 2.1 Inntökuskilyrði

Í 1. mgr. 38. gr. lögreglulaga nr. 90/1996 er kveðið á um hvaða almennu skilyrði nemar í starfsnámi skulu fullnægja. Þar segir:

Mennta- og starfsþróunarsetur lögreglu annast starfsnám lögreglufræðinema og velur nema í starfsnám í samstarfi við háskóla. Ákvörðun setursins um val á nemum í starfsnám er endanleg. Nemar í starfsnámi skulu fullnægja eftirtöldum almennum skilyrðum:

- a. vera íslenskir ríkisborgarar, 20 ára eða eldri,
- b. hafa ekki gerst brotlegir við refsilög, þetta gildir þó ekki ef brot er smávægilegt eða langt er um liðið frá því að það var framið, né hafa sýnt af sér háttsemi sem getur rýrt það traust sem lögreglumenn verða almennt að njóta,
- c. vera andlega og líkamlega heilbrigðir og standast læknisskoðun trúnaðarlæknis samkvæmt fyrirbyggjandi kröfum sem mennta- og starfsþróunarsetur lögreglu setur reglur um í samstarfi við háskóla,
- d. hafa lokið stúdentsprófi eða annarri sambærilegri menntun,
- e. samkvæmt nánari kröfum sem ráðherra setur með reglugerð, á grundvelli tillagna frá mennta- og starfsþróunarsetri lögreglu, m.a. um menntun, starfsþjálfun, tungumálakunnáttu og líkamlega færni.

### 2.2 Sakavottorð

Í 2. mgr. 38. gr. lögreglulaga nr. 90/1996 kemur fram að til að staðreyna hvort viðkomandi uppfylli skilyrði b-liðar 1. mgr. er mennta- og starfsþróunarsetri lögreglu heimilt að afla upplýsinga úr sakaskrá og málaskrá lögreglu.

Mennta- og starfsþróunarsetri lögreglu er heimilt að setja sér verklagsreglur þar sem fram koma þau viðmið sem stuðst er við þegar meta á skilyrði um inntöku á nemum í starfsnám.

### 3.0 Læknisfræðileg viðmið og matsreglur

---

Kröfur til umsækjenda um líkamlegt heilbrigði byggja á mati þriggja sérfræðilækna sem ríkislögreglustjóri fékk til að endurskoða fyrri viðmið í janúar 2019 um kröfur sem gera skal til nemenda sem hefja starfsnám og eru sambærilegar við þær kröfur sem gerðar eru á hinum Norðurlöndunum. Kröfurnar voru endurskoðaðar í febrúar 2020.

Læknisvottorð skal metið og geymt hjá heilbrigðisstofnun, nú hjá Vinnuvernd ehf, Holtasmári 1, 201 Kópavogi og skal senda vottorðið þangað merkt: „Trúnaðarlæknir – starfsnám lögreglu“. Þá er líka hægt að senda læknisvottorðin í gegnum rafræna sendingargátt hjá Vinnuvernd:

<https://transfer.signet.is/Authed/Login?ReturnUrl=%2FAuthed%2FCompanyLoad%3Fgroup%3Dvinnuvernd>

Umsækjendur geta ekki krafist þess að fá vottorð afhent að umsóknarferli loknu.

Trúnaðarlæknir embættis ríkislögreglustjóra veitir mennta- og starfsþróunarsetrinu aðeins upplýsingar um hvort umsækjandi uppfylli kröfur um andlegt og líkamlegt heilbrigði eða ekki, án frekari skýringa.

#### 3.1 Almenn heilbrigðisskilyrði

Umsækjandi skal vera andlega og líkamlega heilbrigður og standast læknisskoðun í samræmi við viðmið mennta- og starfsþróunarseturs lögreglu til að geta talist að fullu fær til að gegna starfi lögreglumanns (sérstakt skjal á vefsíðu menntaseturs lögreglu). Læknir sem starfar á heilsugæslustöð framkvæmir læknisskoðunina og fyllir út eyðublað sem skilað er til trúnaðarlæknis ríkislögreglustjóra. ATH. **Læknisvottorði sem skilað er til trúnaðarlæknis gildir ekki milli ára og má ekki vera eldra en tveggja mánaða þegar sótt er um.**

Nauðsynlegt er, að umsækjendur sem haldnir eru einhverjum þeirra sjúkdóma sem teljast til útilokandi þátta fyrir námið, en óska samt sem áður eftir mati á því hvort umsókn þeirra komi til greina, láti greinargerð sérfræðings fylgja með læknisvottorðinu en sá sérfræðingur verður að vera sérfræðingur í þeirri sérgrein sem sjúkdómurinn fellur undir. Að öðrum kosti telst vottorðið ógilt.

**Mikilvægt er að eyðublaðið sé rétt útfyllt og ber umsækjandi ábyrgð á því að tryggja að svo sé. Ófullnægjandi vottorð getur ógilt umsókn um starfsnám.**

#### 3.2 Aðrar og nánari reglur um mat á umsækjenda

##### 3.2.1 Aldur

Umsækjandi skal vera orðinn fullra 20 ára þegar starfsnám hefst. Aldur miðast við fæðingardag.

### **3.2.2 Tjáskipti**

Hafi umsækjandi ekki gott vald á talmáli og getur ekki tjáð sig með skýrum og óyggjandi hætti getur það útilokað hann frá starfsnámi.

### **3.2.3 Fjárhagsstaða**

Umsækjandi sem er með fjármál sín í óreiðu, t.d. er gjaldþrota eða er í óeðlilega miklum ábyrgðum eða skuldum getur ekki búist við að hljóta inngöngu í starfsnám.

## 4.0 Ferill umsókna

---

### 4.1 Starfsnám auglýst

Mennta- og starfsþróunarsetur lögreglugerir drög að auglýsingu vegna inntöku starfsnámsnema og sendir til lögfræðings hjá embætti ríkislögreglustjóra til yfirferðar. Gæta þarf meðal annars að eftirfarandi:

- Gæta að umsóknarfresti.
- Tilgreina almenn skilyrði
- Tilgreina áætlaðan fjölda starfsnema.
- Umsækjendur bera sjálfir ábyrgð á öflun og afhendingu umsóknargagna.
- Tilgreina hvaða umsóknargögn skulu fylgja umsókn, s.s. vottorð frá lækni skv. staðli MSL og annað sem tilgreint er í auglýsingu.
- Auglýsingin er birt á vefsvæði MSL.
- Fyrirspurnum vegna umsókna skal beina til [starfsnam@logreglan.is](mailto:starfsnam@logreglan.is)
- Umsóknir sem berast innan auglýsts umsóknarfrests eru teknar til meðferðar, en aðrar ekki.
- Lögfræðingur fer yfir umsóknir og tilkynnir umsækjendum ef formskilyrðum er ekki fullnægt.

### 4.2. Umsóknir

Byrjað er á að sækja um starfsnám hjá mennta- og starfsþróunarsetri lögreglu rafrænt á heimasíðu MSL og þar í gegnum Ísland.is (<https://www.island.is/um/island.is>). Eftir að umsókn til MSL hefur verið send fær umsækjandi 4 stafa númer sem hann þarf að tilgreina í umsókn sinni um nám í lögreglufraeðum við Háskólann á Akureyri. Sótt er um rafrænt á heimasíðu HA. Samhliða umsókn skal vottorð frá lækni sent trúnaðarlækni ríkislögreglustjóra samkvæmt staðli mennta- og starfsþróunarseturs lögreglu (sjá kafla 3.0).

Umsóknir sem berast innan auglýsts umsóknarfrests eru teknar til meðferðar, en aðrar ekki.

Fyrirspurnir í tengslum við starfsnámið skal senda á netfangið [starfsnam@logreglan.is](mailto:starfsnam@logreglan.is).

### 4.3 Úrvinnsla umsókna

Umsóknir um starfsnám eru skoðaðar og metnar af mennta- og starfsþróunarsetri lögreglu. Setrið í samráði við HA tekur afstöðu til þess hverjir teljist uppfylla almenn skilyrði sem sett eru, s.s. aldur, menntun, kröfur um andlegt og líkamlegt heilbrigði o.fl. Standist umsækjandi ekki bakgrunnsathugun tilkynnir mennta- og starfsþróunarsetur honum um það ásamt upplýsingum um hvers vegna umsókn hans var hafnað. Ákvörðun setursins um inntöku nema í starfsnám er endanleg sbr. 1. mgr. 38. gr. lögreglulaga 90/1996 með síðari breytingum.

## 5.0 Inntökupróf

---

Þeir umsækjendur sem staðist hafa almenn skilyrði samkvæmt 1. mgr. 38. gr. lögregluglaga eru boðaðir í inntökupróf. Prófað er í þreki en einnig er lagt fyrir umsækjendur sálfræðileg próf og önnur verkefni.

### 5.1. Þrekpróf

Þrekprófið skiptist í þrjá þætti: *hlaup, stöðvaæfingar og sund*. Um er að ræða æfingaröð þar sem reynir á snerpu, styrk, þol og sundkunnáttu einstaklinga.

Nánari upplýsingar um framkvæmd þrekprófa er að finna á heimasíðu MSL [www.menntaseturlogreglu.is](http://www.menntaseturlogreglu.is) undir Lögreglufræði – Þrekpróf.

### 5.5 Sálfræðimat við inntöku á starfsnemum

Umsækjendur um starfsnám sem standast almenn skilyrði gangast undir sálfræðimat þar sem lagt er mat á persónuleika, sálrænt ástand og samskipti. Athuganir þessar hafa verið notaðar víðs vegar um heim í inntökufærli á starfsnemum. Þau eru talin bæði áreiðanleg og réttmæt í þeim tilgangi.

### 5.6 Um framkvæmd prófa

Reikna má með einum degi til próftöku. Gefin eru eðlileg hlé milli prófa.

### 5.7 Undanþágur frá próftöku

Mennta- og starfsþróunarsetur veitir engar undanþágur á próftöku eða veitir fresti til að ljúka prófi. Ef umsækjandi óskar eftir einhverjum sérstökum prófdegi, eða breytingu á prófdegi innan prófatímabilsins, er reynt að verða við því þegar það er mögulegt. Hver umsækjandi fær aðeins eitt tækifæri til að reyna við prófin, hvort heldur akademísku prófin við HA eða þrekprófin. Inntaka nemenda á sér því alltaf stað áður en endurtektarpróf eiga sér stað. Aðeins próf í auglýstri próftöflu og sjúkrapróf eru tekin með.

### 5.8 Sjúkrapróf

Sjúkrapróf verður haldið innan mánaðar frá boðuðum próftíma. Til þess að fá að þreyta sjúkrapróf skal læknisvottorð, er sanni veikindi eða meiðsli, hafa borist mennta- og starfsþróunarsetri lögreglu á neðangreint pósthfang eigi síðar en þremur dögum eftir áður boðaðan prófdag viðkomandi umsækjanda.

Ríkislögreglustjóri  
Mennta- og starfsþróunarsetur lögreglu  
Starfsnám  
Skúlagata 21  
101 Reykjavík

### 5.9 Gildistími inntökuprófa

Inntökupróf gilda ekki milli ára. Umsækjandi sem ekki fær inngöngu í starfsnám lögreglu skal þreyta inntökupróf að nýju ef hann sækir aftur um starfsnám.





## 6.0 Inntaka á nemendum í starfsnám

---

### 6.1 Vinnulag mennta- og starfsþróunarseturs lögreglu

Þeir umsækjendur sem staðist hafa þrekpróf, bakgrunnsskoðun og sálfræðimat sem framkvæmt er af MSL eða önnur próf sem rétt þykir að umsækjandi umgangist hverju sinni eru boðaðir í viðtal.

Viðtalsnefnd skipuð af ríkislögreglustjóra heldur utan um framkvæmd viðtala. Viðtalsnefnd skal skipa að lágmarki þrjá og í henni sitja að minnsta kosti einn lögreglumaður og einn lögfræðingur.

### 6.2 Viðtöl

Þeir umsækjendur sem standast læknisskoðun, þrekpróf og bakgrunnsskoðun eru boðaðir til viðtals. Viðtalið fer þannig fram að allir umsækjendur eru spurðir sömu spurninganna. Svör umsækjenda verða skráð á meðan viðtali stendur. Komi eitthvað fram í viðtalinu sem haft getur þau áhrif að umsækjandi þyki síður heppilegur til að gegna lögreglustarfi skal ritari viðtalsnefndar bóka um það.

6.3. Um inntöku á nemendum í starfsnám:

- Raða skal umsækjendum þeim sem uppfylla framangreind hæfisskilyrði, standast inntökupróf og þá áfanga við Háskólann á Akureyri sem tilgreindir eru í auglýsingu eftir matsþáttum sem tilgreindir eru í kafla 7.1.
- Gera skal ríkislögreglustjóra grein fyrir röðuninni og þeim forsendum sem hún byggir á.
- Ákvörðun MSL um inntöku á nemum í starfsnám er endanleg sbr. 2. ml. 1. mgr. 38. gr. lögregluglaga nr. 90/1996.
- Hæfustu umsækjendunum er boðið að hefja starfsnám með tilkynningu í tölvupósti eða öðrum sannanlegum hætti.
- Þeir umsækjendur sem ekki fá inngöngu í starfsnám er einnig tilkynnt um það með þeim fyrirvara að ef einhver þekktist ekki boðið fái næsti maður á listanum inngöngu í starfsnám.

## 7.0 Atriði er liggja til grundvallar mati á umsækjendum

---

Ákvörðun um hvaða umsækjendum er veitt innganga í starfsnám byggist á heildarmati á ýmsum þáttum, hliðsjón er m.a. höfð af eftirfarandi gögnum:

Þrekprófi, frammistöðu í áföngum fyrstu annar, sálfræðimati, mati læknis, framkomu, hæfni í mannlegum samskiptum, sakavottorði og sakaferli að öðru leyti, auk frammistöðu í viðtali og öðrum verkefnum.

### 7.1 Vægi matsþátta

Að loknu matsferli er nemendum raðað miðað við eftirfarandi forsendur:

- 1) LRF0176160 Inngangur að lögreglufraeði (20%)
- 2) LÖG0176100 Inngangur að íslenskri lögfræði (20%)
- 3) Viðtal, sálfræðimat, þrekpróf og önnur verkefni (60%)

Frammistaða í tveimur áföngum við Háskólann á Akureyri fyrstu annar vegur 40% af mati við inntöku og niðurstöður þrekprófa, viðtal, sálfræðimat og verkefni framkvæmd af menntasetri lögreglu vegur 60%.

Aðferðafræðilegar forsendur við mat inntöku þeirra nemenda sem fá inngang að íslenskri lögfræði metinn úr fyrra námi fá meðaltalseinkunn þeirra umsækjenda sem komu til greina eftir að hafa staðist alla þætti matsins. Ef umsækjendur telja sig geta fengið hærri einkunn en meðaltal áfangans er mælt með því að þeir taki áfangann. Ekki er hægt að vita meðaltal áfangans fyrirfram.

### 7.2 Starfsnemar í starfsnámi

Starfsnemar skulu;

- vinna heit samkvæmt ákvæðum 29. gr. lögreglulaga nr. 90/1996,
- skrifa undir yfirlýsingu um þagnarskyldu, heitstaf lögreglumanna og siðareglur lögreglu,
- lúta siðareglum lögreglu. Brot á siðareglum getur varðað brottvikningu úr starfsnámi,
- lúta skólareglum þeim sem að MSL setur hverju sinni,
- skrifa undir yfirlýsingu um leyfi til myndbirtingar í starfsnámi,
- hafa kynnt sér ferilvöktun.

## **8.0 Að loknu inntökuferli**

---

### **8.1 Að inntöku lokinni**

Almenna reglan, skv. 15. gr. stjórnssýslulaga nr. 37/1993, er sú að umsækjandi á rétt á að kynna sér skjöl og önnur gögn er mál hans varða.

### **8.2 Almenn t vinnulag**

Vinnulag mennta- og starfsþróunarseturs er þannig að fyrirspurnir um niðurstöður prófa og inntökuferlið skal beint til [starfsnam@logreglan.is](mailto:starfsnam@logreglan.is) en heimilt er að gefa umsækjendum svör um atriði er varða þeirra frammistöðu.

Mennta- og starfsþróunarsetur svarar ekki öðrum en umsækjendum sjálfum eða fulltrúum þeirra sem hafa skriflegt umboð.

### **8.3 Athugasemdir**

Ákvarðanir setursins um inntöku á nemum í starfsnám eru endanlegar skv 1.mgr. 38.gr. lögreglulaga nr.90/1996. Þær eru með öðrum orðum ekki kærarlegar.

Athugasemdum vegna inntökuferlis skal beina til ríkislögreglustjóra í gegnum netfangið, [starfsnam@logreglan.is](mailto:starfsnam@logreglan.is). Almenna reglan er sú að ákvörðun er ekki endurskoðuð nema ný gögn, sem geti breytt málum, hafi komið fram eða líkur eru á að gögn hafi verið rangt metin. Varði formlegar athugasemdir framkvæmd prófa, aðstöðu eða annað því um líkt, ber ríkislögreglustjóra að fjalla um þær og tilkynna viðkomandi hver niðurstaðan hafi orðið.

### **8.4 Rökstuðningur**

Umsækjandi sem fær ekki boð um starfsnám á rétt á rökstuðningi á þeirri ákvörðun setursins, sbr. 21. og 22. gr. stjórnssýslulaga nr. 37/1993.